



KOMISIONI QENDROR I ZGJEDHJEVE

www.cec.org.al

DREJTORIA EKOMISIONEVE ZGJEDHORE, TRAJNIMIT DHE EDUKIMIT TË ZGJEDHËSVE

RELACION

PËR PROJEKTVENDIMIN "PËR DISA SHITESA DHE NDRYSHIME NË UDHËZIMIN NR. 4, DATË 19.02.2013 "PËR PROCEDURAT E PËRZGJEDHJES DHE TRAJNIMIT TË SHITESAVE QË MUND TË EMËROHEN KRYESISHT NGA KQZ, PËR PLOTËSIMIN E VAKANCËS SË KRIJUAR NË KZAZ DHE KQV"

Kodi Zgjedhor, në nenin 29, pika 5, dhe nenin 36, pika 5, përcakton rastet kur KQZ dhe KZAZ plotësojnë vakancat përmes emërimeve kryesisht, respektivisht të anëtarëve të KZAZ-ve dhe anëtarëve të KQV-ve, për të siguruar kuorumin e nevojshëm të anëtarëve.

Neni 29, pika 5, urdhëron që KQZ me udhëzim të veçantë përcakton procedurat për përzgjedhjen dhe trajnimin e shtetasve që mund të emërohen kryesisht.

Komisioni Qendror i Zgjedhjeve, në zbatim të nenit 29, pika 5, të Kodit Zgjedhor, ka miratuar Udhëzimin nr. 4, datë 19.02.2013 "Për procedurat e përzgjedhjes dhe trajnimit të shtetasve që mund të emërohen kryesisht nga KQZ për plotësimin e vakancës së krijuar në KZAZ dhe KQV".

Bazuar në rregullat e përcaktuara në aktin normativ sipërcituar, KQZ-ja ka kryer procedurat për emërimin kryesisht dhe trajnimin e shtetasve për të plotësuar vendet vakante në Komisionet e Zonave të Administrimit Zgjedhor dhe në Komisionet e Qendrave të Votimit, për zgjedhjet për Kuvendin 2013 dhe 2017, dhe zgjedhjet për organet e qeverisjes vendore 2015.

Konkretisht, për zgjedhjet për Kuvend 2017, shprehën interesin përmes aplikimit për t'u emëruar kryesisht nga KQZ anëtarë apo sekretarë të KZAZ-ve 211 shtetas, për plotësim të 90 vakancave, 45 në detyrën e anëtarit dhe 45 në detyrën e sekretarit të KZAZ-ve, ku në zona të caktuara zgjedhore numri i shtetasve në listën e miratuar nga KQZ, ishte më i madh se numri i vakancave në KZAZ-të përkatëse.

Përzgjedhja e shtetasve nga lista e miratuar me vendim të KQZ për emërimin kryesisht për plotësim të vakancave, dëshmoi vështirësi në rastet kur numri i shtetasve/aplikantëve që plotësonin kriteret e përcaktuara në aktin normativ të KQZ-së, trajnime në fushën e zgjedhjeve, eksperiencë të mëparshme në administratën zgjedhore dhe kualifikimeve profesionale, ishte më i madh se numri i vakancave.

Për zgjedhjet vendore 2019, në përgjigje të njoftimit publik të KQZ-së për shprehje interesi për emërim kryesisht si anëtar apo sekretar të KZAZ, i janë përgjigjur dhe kanë aplikuar mbi 300 shtetas, pra përgjithësisht për të gjitha zonat zgjedhore ka disa aplikime.

Projekt-akti i paraqitur, në frymën e "Garancive procedurale" të Kodit të Praktikave të Mira për Çështjet Zgjedhore të Komisionit të Venecias, ka për qëllim detajimin e rregullave për emërimet kryesisht, si në rastet kur ato zbatohen nga KQZ apo nga KZAZ, në funksion të rritjes së transparencës në organizimin dhe administrimin e procesit zgjedhor, dhe rritjes së sigurisë për kryerjen e procedurave në respektim të plotë të përcaktimeve ligjore.



Për sa më lart referuar, në përmbushje të kompetencës për drejtimin dhe kontrollin e procesit zgjedhor, KQZ i paraqiten për miratim shtesa dhe ndryshime në Udhëzimi nr. 4, datë 19.02.2013 "Për procedurat e përzgjedhjes dhe trajnimit të shtetasve që mund të emërohen kryesisht nga KQZ për plotësimin e vakancës së krijuar në KZAZ dhe KQV", të cilat konsistojnë në:

- Përcaktimin e procedurave për përzgjedhjen e anëtarëve apo sekretarëve të KZAZ-ve që do të emërohen kryesisht nga KQZ për plotësim të vakancave, në ato zona zgjedhore ku numri i aplikimeve është më i madh se numri i vakancave. Bazuar në listën e shtetasve të miratuar paraprakisht me vendim të KQZ-së, përzgjedhja do të bëhet mbi bazë shorti. Për zonat zgjedhore, të cilat janë të ndara në disa në disa KZAZ, dhe ka vakanca të pozicionit të anëtarit dhe sekretarit, së pari do të hidhet shorti për përzgjedhjen e shtetasve që do të emërohen kryesisht si sekretar dhe më pas do të hidhet shorti për përzgjedhjen e shtetasve që do të emërohen kryesisht si anëtar. Ky rend përcaktohet me qëllim që shtetasit me arsim juridik, të cilët marrin pjesë në shortin e parë por nuk përzgjidhen, të bëhen pjesë edhe në shortin e dytë që hidhet për anëtar të KZAZ.
- Përcaktimin e procedurave që do të zbatojë KZAZ për përzgjedhjen me short të anëtarëve të KQV-ve që do të emërohen kryesisht për plotësim të vakancave, nga lista e shtetasve të miratuar me vendim të KQZ-së;

Bazuar në përcaktimet e pikës 4 të nenit 23 të Kodit Zgjedhor, të ndryshuar, aktet normative të KQZ kanë karakter të përhershëm dhe zbatohen si rregull në të gjitha zgjedhjet. Këto akte rishikohen për shkak të ndryshimit të ligjit apo për shkaqe të tjera që përligjin ndryshimin e tyre.

Ana TENOLLI- Drejtoria e Komisioneve Zgjedhore, Trajnimit dhe Edukimit të Zgjedhësve

Dëshira Pasko- Drejtoria Juridike

Ylli Merkaj- Sekretar i Përgjithshëm i KQZ-së

